



Emanuelle dal chantun Vad ed il buc spetgan sin il fotograf. Il buc dastga laschar en ses vestgi. Emanuella sto star senza sia cuverta chauda avant la camera.



Ils vadels han almain anc plegna che protegja da la fradaglia. Vroni dal chantun Sviz ha mo ils dessous che na stgaudan lidi nagut.

Sut diesch grads ed en dessous

Shooting a Schlans ed a Vella

DA CLAUDIA CADRUVI / ANR

■ Il proxim chalender per purs vegn da Schlans e da Vella. Là han 14 puras giuvnas mussà avant diesch dis pulit blera pel e bravamain pauca taila – en tutta fradaglia. Igl è stà gist lezza fin d'emna ch'i ha navì enfin 1200 meters sur mar. Perquai han probabel be paucs viandants remartgà, tge chaussas ch'èn sa splegadas sin ils dus bains purils da Renzo Blumenthal a Vella e da Silvio Pfister a Schlans. Ils dus umens da bellezza han gi' visitas da la squadra dal «Bauernkalender» e da 14 puras attractivas. Lezzas cudizzan en il chalender 2011 cun tuttas bellezzas che la natura ha regalà ad ellas.

Strapsas empè da mantels

Malgrà las fradaglias saja l'atmosfera a Schlans ed a Vella stada buna, di Mike Helmy che producescha dapi intgins onns il chalender cun maletgs da puras eroticas. Tuts hajan gi' plaschair da lavar sin ils dus bains purils en Surselva.

Las giuvnas puras hajan stuì schelar, ma tuttina n'hajan ellas betg tugnà. «Cun vairs models n'avess ins mai pudì far in shooting sut talas cundiziuns», lauda Helmy la bella pel dira da sias puras giuvnas.

Entant che la squadra da fotograf e da visagistas è stada vestgida cun mantels

d'enviern e chalzers auts, han las mattas stuì sa postar cun dessous, strapsas e chalzers cun tatgs satigls sin las pradas.

San ins insumma anc far bucca da rir sut talas cundiziuns? I saja ina vaira sfida da vesair ora bain, sch'ins schelia, conceda Helmy.

Pel-giagliana u pel blaua?

E tge èsi, sch'ins vesa che las dunnas han pel-giagliana dal spir fraid? Gliez na fetschia nagut, di Helmy. Pel-giagliana u pitschens chavels che stettian agradi vesian ora caztgant. El na haja betg en senn da retuschar davent tals detagls. Mender saja, sche la pel fiss blaua. En gliez cas stoppian ins far midadas ed elavurar il maletg.

Trais dis ha la squadra dal «Bauernkalender» lavurà a Schlans ed a Vella. Ils dus purs, Renzo Blumenthal e Silvio Pfister, hajan gidà tar il shooting e schizunt amis e vischins sajan stads survetschavels ed hajan emprestà animals, requisits u schizunt purschì da baiver e da mangiar.

Sch'ins fetschia in tal shooting, sajan ins avisà sin agid, explitgescha Helmy. Ins veglia gea la finala mussar las puras cun animals dal lieu e betg prender animals si da la Bassa. Era per savair fotografar en ina stalla stoppian ins avair insatgi che saja pront da far or d'uiel avant ch'il shooting cumenzia.

Tgi èn las pli bellas?

Per che ils models sa preschentan a moda perfetga avant la camera lavuran radund otg persunas en la squadra: in fotograf, duas persunas ch'èn responsablas per ils dessous, ina stylista, ina visagista, in requisitur, in organisatur e l'editur.

Helmy n'è berg pur. El ha era gia stuì radlar la critica ch'inqualina da sias puras eroticas na sajan insumma nagina pura. Tuttina para el d'avair success, perge il 2011 dat el gia ora il settavel chalender cun in'edizium da 13 000 exemplars. Il chalender per puras – nua ch'ìls purs sa mussan cun pèzs nivs e bratscha musculusa – edescha Helmy l'onn proxim per la terza giada. El ha en senn da stampar in'edizium da 7000 exemplars.

Dal remiment: Gist durant quests dis sa chatta Helmy cun sia squadra en Baviera (Bayern). Là ha lieu il shooting per l'emprim chalender per purs da Germania. E tgeninas puras èn lura pia las pli bellas? Las Svizras u las Tudestgas? «Sin questa dumonda na pos jau da preschent dar nagina resposta. Jau sun gist circumdà da Tudestgs», di Helmy che sa chatta amez il shooting.

Sto pia esser ch'el avess gugent ditg che las puras svizras sajan in toc pli bellas che las tudestgas.



Salome dal chantun Argovia ha cletg e dastga sa postar sin la pigna-scalegl.




En stalla è Michele dal chantun Berna almain protegida dal vent criv.

FOTOS MAD



La «visagista» sminchescha Michele dal chantun Son Gagl.



La frisura sto esser tip top e suentar dastga era Beatrice dal chantun Sutsilvania star avant la camera.